



La'ó Hamutuk nia Komentáriu kona-ba Ezbosu Dekretu Lei Pesticida

02 July 2017

Konteúdu

- Pesticida fó liu benefísiu ba kompañia sira duke agrikultór sira
- Kompañia agroteknolojia sira iha podér maka'as iha setór agrikultura
- Métodu di'ak liu kontra peste mak Prevensaun

La'ó Hamutuk hakarak agradese ba FAO no Ministériu Agrikultura no Peska ne'ebé fó oportunidade ba ami hodi ható'o ami hanoin kona-ba ezbosu lei pesticida ba Timor-Leste. En prinsípiu La'ó Hamutuk konkorda katak tenki iha kontrolu ida ne'ebé rigorozu ba introdusaun no aplikasaun pesticida kímiku iha Timor-Leste, lii-liu iha setór agrikultura.

Maski nune'e ami la halo komentáriu espesífiku ba ezbosu lei ne'e tanba ami nota katak ezbosu lei ne'e kuaze hanesan deit ho lei pesticida ne'ebé aplika iha rai seluk no hetan ona sujestaun atu inklui kritéria sira ne'ebé tuir padraun FAO nian. Ami fiar katak en termu de kontrolu no proteje, lei ne'e maizumenus bele garante ona. Maibé La'ó Hamutuk hanesan organizaun ida ne'ebé defende prinsípiu soberania ai-han en prinsípiu la konkorda ho uzu pesticida kímiku iha produsaun agríkola tanba nia impaktu longu prazu ba ema, animal, meu ambiente, ekologia, no mós kria dependénsia husi agrikultór sira ba kompañia sira ne'ebé prodús pesticida.

Tuir mai ne'e ami nia sujestaun sira ba Ministériu Agrikultura no Peska no FAO atu konsidera bainhira diskute kona ba lei hodi regula pesticida iha Timor-Leste.

Pesticida fó liu benefísiu ba kompañia sira duke agrikultór sira

Agrikultór Timor-Leste too oras ne'e bele konsidera hanesan agrikultór ne'ebé independente, tanba la depende maka'as ba kompañia sira. Ida ne'e akontese tanba sistema agrikultura iha Timor-Leste sei natural no uzu pesticida sei limitadu tebes. Maibé bainhira uzu pesticida sae maka'as ona agrikultór sira nia independénsia ne'e sei lakon, sira sei sai dependente ba pesticida sira ne'e hodi kontrola peste iha sira nia toos no natar sira. Esperiéncia iha nasaun barak, inklui iha Indonesia, Tailândia no Australia,

hatudu ona katak dependéncia ba input kímiku sei hatodan liu tan agrikultór sira nia moris.

Kompañia sira ne'ebé prodús pestisida nia interese prinsipál mak hetan lukru liu husi introduz pestisida oi-oin. Sira nia lukru aumenta barak liu tan bainhira problema peste sai maka'as liu tan. Iha tempu ne'ebé agrikultór sira sofre lakon maka'as, kompañia sira nia lukru aumenta. Agrikultór barak iha nasaun dezenvolidu no mós foin dezenvolve-an sira tama ona ba lasu dependéncia ba kompañia sira ne'e no tinan-tinan tenki gasta osan barak atu bele mantein ka hasa'e sira nia produsaun.

Pestisida kímiku nia impaktu negativu relata iha peskiza no estudu barak ona. Governu iha mundu tomak rekoñese ida ne'e no kria regulamentu hanesan lei pestisida hodi prevene ka minimiza impaktu negativu sira ne'e. Kompañia agroteknolojia sira mós rekoñese ida ne'e hodi kontinua hadi'ak sira nia produtu atu bele koresponde ba kritéria ne'ebé haktuir iha lei sira ne'e. Maski nune'e buat sira ne'ebé kompañia sira muda laos esensiál. Sira muda deit kompozisaun no maneira de aplikasaun husi pestisida kímiku sira ne'e atu tuir regra sira ne'ebé eziste. Impaktu longu prazu husi aplikasaun pestisida kímiku sira ne'e hanesan nafatin: destruisaun ba sistema natural no kria dependéncia agrikultór sira ba kompañia agroteknolojia sira.

Kompañia agroteknolojia sira iha podér maka'as iha setór agrikultura

Kompañia sira ne'ebé prodús pestisida iha influencia maka'as iha mundu tomak, liu-liu iha nasaun sira ne'ebé dependente ona ba pestisida. Kompañia sira ne'e iha kapitál finanseiru no rekursu umanu ne'ebé di'ak liu nasaun barak no sira bele influencia polítika iha nasaun barak. Iha nasaun boot hanesan Estados Unidus deit influencia grupu lobista kompañia sira ne'e nian tama too iha sira nia kongresu. Tanba ne'e maski nasaun sira iha lei ne'ebé forte atu regula pestisida, implementasaun lei sira ne'e sei hasoru bareira barak, liu-liu husi grupu sira ne'ebé hetan benefísiu husi sirkulasaun pestisida.

Ami kontente katak proposta lei ida ne'e antisipa ona influencia external iha prosesu registrasaun pestisida nian, no kria Konsellu pestisida hodi minimiza influencia sira ne'e. Maibé ida ne'e nafatin la taka dalan ba intervensaun husi parte ne'ebé iha podér no interese. Tanba ne'e ami sujere atu lei nee obriga Konsellu pestisida hodi estabelese mekanizmu ida ne'ebé transparente no nakloke ba públiku iha prosesu registrasaun nian. Prosesu ida ne'ebé transparente maka dalan di'ak liu atu prevene korrupsaun iha prosesu registrasaun pestisida, tanba públiku mós bele akompañia no fó hanoin bainhira akontese irregularidade.

Métodu di'ak liu kontra peste mak Prevensaun

Estudu no peskiza barak esplika ona tanba sá peste sai problema iha produsaun agrikultura. Peste mosu iha ambiente ne'ebé favorese ba nia moris. Ambiente ne'e dala barak ema mak kria liu husi manipulasaun ba rai, fini no aihoris, no fatór produsaun sira seluk hodi hasa'e produsaun. Ita akompañia ona oinsá introdusaun planta foun bele

hamenus peste ka habarak tan peste, hanesan kazu ne'ebé akontese ho introdusaun kabas GM nian balu.

Infelizmente maski iha ona peskiza no estudu barak hodi komprende karakterístika peste sira nian no ofere se kontrolu alternativa seluk alein de pestisida kímiku, lei sira ne'ebé regula kona ba pestisida iha nasaun ida-idak, falla atu rekoñese no promove alternativa sira ne'e. Governu sira mós gosta liu hili dalan fasil atu kontrola peste maski fó impaktu negativu longu prazu, duke investe ba sistema kontrolu ne'ebé di'ak liu ba agrikultór nia moris, ambiente, no ekologia en jerál.

Ami enkoraja governu Timor-Leste atu adopta sistema agrikultura ne'ebé prevene uzu pestisida kímiku. Sistema sira hanesan agrikultura familiar, orgániku, eskala kiik, diversifikadu no adapta ba kontextu natural alein de hamenus vulnerabilidade ba peste, fasil mos atu kontrola ho métodu seluk ne'ebé la uza pestisida kímiku. Sistema sira ne'e belu uza kontrolu natural, métodu balu konservasaun agrikultura nian, kontrolu biolójiku no pestisida orgániku.

Konkluzau - Rekomendasaun

Relasiona ho proposta lei ami rekomena atu inklui artigu ida kona ba transparénsia iha prosesu registrasaun nian, atu públiku bele kontrola prosesu ne'e no mós loke dalan ba ema hotu atu hato'o sira nia idea ka esperiénsia ho pestisida sira ne'ebé atu rejista.

En termu de polítika dezenvolvimentu agrikultura iha Timor-Leste, ami fiar katak uzu de pestisida kímiku fó dezvantajen boot liu kompara ho vantajen ba agrikultór sira. Ami hanoin katak governu Timor-Leste tenki avalia no define klaru saida mak polítika ne'ebé di'ak liu atu rezolve kestaun peste. Iha opsaun barak ne'ebé Timor-Leste bele esplora. Opsaun pestisida kímiku mak opsaun ne'ebé fasil liu maibé nia impaktu negativu sei sofre laos deit husi agrikultór sira ohin loron ne'e maibé mós agrikultór sira iha futuru. Opsaun ne'ebé di'ak liu mak prevensaun. Pratika sistema agrikultura ne'ebé la kria ambiente ba peste, hamenus vulnerabilidade ba peste no fasil atu kontrola ho métodu natural, biolójiku, ka pestisida orgániku sira. Opsaun ne'e presiza investimentu no esforsu maka'as liu, maibé ninia retornu sei fó benefísiu ba agrikultór sira ohin loron no iha futuru.

Obrigadu wain ba ita boot sira nia atensaun. Ami nakloke atu diskute kle'an ho ita boot sira bainhira presiza.

Ami saran lia,

**Mariano Ferreira & Maxi Tahu
Ekipa Agrikultura**